

Studentenan di IPA:

“Nos a ripara cu droga cu alcohol ta causa di hopi problema social”



ORANJESTAD - Recientemente un grupo di estudiante di IPA a duna un presentacion basa riba Fundacion Anti Droga Aruba.

E studentenan ta conta cu nan a scoge pa e fundacion aki, pasobra ora nan core stage na scolnan nan ta en contra cu hopi mucha cu tin problemanan social den nan cas. Hopi biaha e problema social aki ta pa causa di droga y alcohol.

Segun e studentenan, nan kier a pone enfoca riba e fundacion aki. Nan a crea un video portfolio pa e fundacion pa trece dilanti un perspectiva nobo. Hopi hende ta pensa cu nan mester bay FADA ora cu den cas tin un situacion di droga y alcohol caba. Pero FADA no ta un fundacion cu ta traha ora cu e situacion a presenta caba. E ta traha di un manera preventivo. Nan a traha e video basa riba kico e fundacion di en berdad ta haci. E proyecto



riba su mes no tabata dificil. Segun e studentenan, locual tabata un reto debi na cu e no ta nan area di experticio tabata pa haya hende pa participa aden. Como futuro docentenan e studentenan ta bisa cu droga y alcohol ta algo cu no ta bon den sociedad, pero trahando cu e fundacion nan a bin realisa cu si un mucha wordo siña desde chikito cu esaki no ta algo corecto. Aunke cu tin droga y alcohol den cas e ta haci e chens pa nan tambe cay den

adiccion bira menos.

Buki di informacion

Aparte di e video, tambe e studentenan a desaroya un buki informacion pa muchanan entre 4 pa 8 aña y un cahá di actividad cu 5 diferente actividad den dje 3 pa kleuter y dos pa scol basico. E muchanan lo haci un ehercicio hopi simpel. Pues kies kico ta corecto y kico no ta corecto. Nan a scoge edad aki, aunke cu e ta un tema delicado y no

por yega duna e muchanan asina, asina. Pero nan a haci esaki, pa e motibo ariba menciona. Mas lihe e muchanan cuminsa comprende cu droga y alcohol ta algo malo, mas minimo e chens ta bira cu nan ta mishi cun'e.

Nan a haci un estudio te hasta con pa por duna e informacion aki na mucha y a bin sali afo hopi cla cu e ta un informacion cu no por wordo duna directamente.

Pues mester duna esaki basa riba e habilidad social di e muchanan. Siña muchanan e norma y e balornan y a base di esaki e cahá di actividad y e buki di informacion ta diseña. Cifranan di FADA, di aña 2014 a demostra cu tin muchanan cu ya caba cu 9 aña ta cuminsa uza droga. Pues esaki ta un bon proyecto pa cuminsa ehecuta na scolnan. Nan ta cuminsa na kleuter caba conscientisa tocante e tema aki. □